



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8 Yangia anidakangma : Tir Yimiyim tir_yimiyim

tir yimiyim TAPAK 7

November ita Nadal tennis asayaba nungi anisungzüksü

2024 Nobel Prize in Literature atema Han Kang shimogo

VOL. XXII ISSUE NO. 03 (ADOK 03) DIMAPUR ROGONÜ (FRIDAY) MONGPUTENI (OCTOBER) 11, 2024 ₹ 5.00

Chumoukedima-Peren arrtsülen tenokdangba agütsür Ratan Tata nem State Honours agüja mang rongdokogo

Dimapur, October 10, 2024 (TYO): Chumoukedima-Peren arrtsülen mepetmesü adokba atema Commissioner of Police, Dimapur-i tenokdangba ka agütsüogo.

Bharatiya Nagarik Suraksha Sanhita, 2023 nung Section 163 kükok Kevithuto Sophie, IPS-i tenokdangba agütsü aser iba ya iba tesem nung tensa süngjema ayutsü atema lir.

Iba tenokdangba kükok nisung pungu aser tema

adenshitsü memelar aser prangpong, süng, nok, nü aser lijak amshitsü memelar.

Iba tenokdangba ya Vihuto Village nungi Khehoyi Village aser Kiyevi Village aser Chumoukedima-Peren arrtsülen agütsür.

Iba tetuyuba sangdong balala ajanga sangoktsür aser Chumoukedima, DCPS, ADCPS, ACPs aser police station ajak notice boards nung ayutsü ta Commissioner of Police, Dimapur-i metetdaksüogo.

Aor lanur 2 pur aoba aitsür: AYFD & FAYO

Dimapur, October 10, 2024 (TYO): Diphupar nung October 10, 2024 nü Aor lanur ana pur aoba aitsür ta Ao Youth Forum Diphupar (AYFD) aser Foothill Ao Youth Organisation (FAYO) teloktemi sangdong balala ajanga metetdaksüogo.

"Ozü züngsem tajung ana Temsu aser Akum na pur aoba khukhua aotsür aitsür. Iba tatalokba ajanga nübertem asoshi tetsübu tensa ka bentsür aruogo" ta AYFD-i ashi.

Bangdakpurtemi iba tatalokba jungjunga bushisüngdang asütsü aser telemtetba tajung agia inyaksangshitsü imlar, ta parnoki ashi.

Naga loktiliba nung iba ama tesempatsü mapa senso ajaki

aitsütsüla aser külemi ibala inyakyim anema ola adoktsü ayongzükter ta President Alem Lemtur aser General Secretary I Among Lemtur nati sangdong ka nung ashi.

Brihostibar nap mejangjatetba nisung kari M/s Living water, Naga United Village, Chumoukedima nung driver aser handyman na pur aoba khukhua aitsür ta FAYO-i metetdaksüogo.

Tangagetba shitak alir ajaki iba ama tesempatsü mapa aitsütsüla. Ozüng amertemi iba mapa inyakterem tekaratiba nung aputsü aser ozüng tapet agi merenshitsü akhanger ta President Achen Imchen aser AGS Purnungsang nati sangdong ka nung ashi.

Dimapur Railway Station ulushitsüla: ACAUT

Dimapur, October 10, 2024 (TYO): Northeast Frontier Railway (NFR)-i Dimapur Railway Station renloksüba mapa nung meyariteper ta ACAUT Nagaland-i metetdaksüogo.

Dimapur Railway Station yanglushitsü atema Rs. 283 crore lemezükja lir aser April 30, 2024 nungi mapa tenzüksüba liasü saka state sorkari railway ali atsünga agirtem meindoktsü mapa meinyakba ajanga iba mapa metenzükter ta ACAUT-i ashi.

Dimapur Railway Station nung passengers meyrjang 10 shi senzüsenbonger aser Northeast Frontier Railway (NFR) nung sen teimtiba aazükba station tanabuba lir saka küm aika terenlok melii dang arur.

Prime Minister Narendra Modi-i August 6, 2023 nü Rs. 1 Lakh crore endoka linük nung railway stations 508 yanglushitsü mapa tenzüksü aser iba nung Dimapur railway station dena lir. Ajisüaka Railway facilities ulushitsü atema ali peria maliba ajanga Dimapur nung iba mapa metenzükter lir, ta ACAUT-isa ashi.

Küm aika tejakdang nungi Dimapur railway ali atsünga agia arur aser railway ali hectares 53.806 nungi hectares 30.283

tashi atsünga agiogo ta ketdangsürtemi ashir.

Nagaland sorkari ozünga alema ali atsünga agirtem memeindokteter mesüra NFR nem tanga lenmang kecha mesayuteter. Dimapur Railway Station ya Thahekhu Block-7 mesüra tangalen belena moura tanga railway station alidak ulushitsüba ya tamakoktsü ama bilemer ta ACAUT-isa ashi.

NFR-i state sorkar dang mepishiogo aser sorkari mapa inyaktsü atar. Külen ali atsünga agiba atema detailed joint survey ano meinyak lir aser iba ajanga NFR-i iba mapatong athitsü mesüra Assam nung anameta aliba station ka nung ang mapa inyaktsü akok. Iba ajanga Dimapur ya transit station ka dang akümtsü aser Nagaland nung alirtem akoksatsü ta parnokisa metetdaksü.

Iba redevelopment scheme ajanga mapa noklang aika adoktsü saka state sorkari teinyaktsü tim meinyakba ajanga asenok ang akoksatsü ama lir. Anungji Nagaland sorkari ali atsünga agirtem meindoktsüla, ozünga alema yangluba kiojen raksatsüla aser aliji Indian Railways ket nung agütsütsüla ta ACAUT Nagaland-isa metetdaksüogo.



Mumbai, October 10, 2024 (Agencies): Brihostibar nikongdang Mumbai crematorium nung asür Ratan Naval Tata nem State honours agüja mang rongdokogo.

Iba sentong nung Home Minister Amit Shah-i anir tongtipang nisung aika aden. ASEAN-India aser East Asia summits nung adentsü atema Prime Minister Narendra Modi Laos-i apusoa ogo aser iba jagi Amit Shah-i PM Modi tenüng nung shilem agi.

Amit Shah den Union Commerce Minister Piyush

Goyal, Maharashtra Chief Minister Eknath Shinde aser Deputy Chief Minister ana-Devendra Fadnavis o Ajit Pawar nungeri asür Ratan Tata mang rongdokba sentong nung aden.

Tanü Ratan Tata mang linük wako agi meibanger Nariman Point nung National Centre for Performing Arts nung ayu aser iba sülen Worli nung crematorium-i bener ao.

Tanü nisung meyrjang aika adenshia asür Ratan nem tetushi agüja liasü. Pa ya Mumbai nung soa inet aser alima nung

tetshitsüsa Tata brand ajungket.

Maharashtra sorkari asür Ratan Tata nem tetushi agüja "day of mourning" sangdongogo.

Ratan Tata-i industrial aser development sectors aser economy wadang balala nung shilem agiba ajanga nisung meyrjang aika taküm melenshidaksüogo.

Paisa luxury brands Jaguar aser Land Rover amala alizükba ajanga alima automotive sabang nung India tenüng ajungketa liasü. Ratan Tata-isa azü kanga meimba ajanga Mumbai nung azü atema Rs 165 crore hospital ka yangluja lir.

Ratan Tata ya yasüng Breach Candy Hospital, Mumbai nung asü. Pa arishi küm 86 liasü.

Hombarnü pa temang mejungi akümba ajanga mozü kidang anioka liasü.

Ratan Tata ya December 28, 1937 nü Mumbai nung aso. Pai 1991 nungi 2012 tashi Tata Group nung Chairman ama inyaka aru aser iba sülen pa Tata Sons nung Chairman Emeritus shima tasünü tashi inyakogo.

15 Buba Aoli Longpok Semchir Lemtur Mungdang Chuchuyimpang yimtak agidagi



15 Buba Aoli Longpok Semchir Lemtur Mungdang October 10 nikongdang Chuchuyimpang yimtak akadang Puti Talen ta asüba onük nung ajemdaker Jorhat Ao Baptist Arogo, Pastor Wb. Imli P. Lemtur-i jembidang tangokba noksa.

Mokokchung, October / Mongputeni 10 (TYO): 15 Buba Aoli Longpok Semchir Lemtur Mungdang October 10 nikongdang Chuchuyimpang yimtak "Merases Nükmen" omen nung ajemdaker tenzükogo.

Iba mungdang mezüngbuba sentong nung "Puti Talen" ta asüba onük nung ajemdaker Jorhat Ao Baptist Arogo, Pastor Wb. Imli P. Lemtur-i jembidang Lemtur otsü wazüka ayutsübaji kanga dang tongtipang lir, Lemtur puti bushibaji tangar kidong den tokteptsüba asoshi masütsüla saka Lemtur kong nungi koma aru ibaji tongtipang südaksütsülata ashi.

Asenok Aor otsüji tebang agi dang jembia aru aser kelen yim ka nungi yim ka ta belenshia jembia arudang amatokba mesüra mangajemba-a alitsüa akok, sakasa tang kechisa metetjema lir itemji kanga junga rizünga ayutsü

kanga dang nungtaker. Item otsütem dak ajemdaker tsükong 6 nung aliba Lemtur-tem longjemtsü kanga dang nungtaker, kechiaser iba jagi Ao kin longjemba nung shilem tulu agiteter asütsüta tongti O jembir-isa ashi.

Tongti o Jembir Imli P. Lemtur-isa Lemtur-i Puti Talen bubshiba mapang nung Tsüngrem akhumtsüba bushira Lemtur nem Tsüngremi temoatsü agütsütsü aser alimai metettsüsa lemtur nübo tajung jenti adoktsüta adenshia aliba mungdangsangertem ayongzüka jembi.

Kasa sentong nung sentong tenzükta Rev. Lima Lemtur-i sarasadem, LSLM Tir Wb. Lipokyangar Lemtur-i tarur pela-a agizüka jembi, Chuchuyimpang Village Council Chairman Wb. I. Zulu Imsong-i tepela o jembi,

Mokokchung Municipal council Deputy Chairman Wb. Lanuakum Lemtur aser

Addl. Director, Dept. of Agriculture Wb. Yongchang Phom tenati ni ya shiner ta asüba ajanga tayongzükba o jembi aser Kr. Akumsen Lemtur ajanga ken tajung ka tena sentong tobur jungdaksü aser ano Tuli Lenden telen Lemtur telongjem-i Lemtur lipok ken ka aten aser taoba Tir ALSLM Wb. Punatoba-i sarasadema sentong tembanga liasü. Iba sentong Chuchuyimpang Lemtur telen ajanga kanga dang mera ketketa lapoka liasü.

October 11 nü sentong nung Tetushi tejaoker Wb. S. Rongsennungba Joint Director, ATI, Kohima asütsü aser Rev. Dr. A. Tali Ao ajanga "Merases Nükmen" onük nung ajemdaker jembitsü aser sentong balala agitsü tarensena renema lir.

Nagaland nungi osangbener temi Maharashtra semdang tEA ajanga Kohima nung Run to Reforest 2.0 ayongzüksü



Dimapur, Mongputeni/Oct. 10 (TYO): Ministry of Information & Broadcasting kübok Press Information Bureau Kohima ajanga Nagaland nungi osangbenertem asoshi Media Tour sentong ka October 1-8, 2024 anogotem ayongzüka luasü. Iba tour nung print, electronic aser digital media sapangtem nungi aser state Department of Public Relation & Information, Akashvani aser Dordarshan nungi osangbener 13 shilem agia liasü.

Iba sentong nükjidong ya osangbener nem central sorkar indang scheme aser project balala Mumbai nung inyakba tali tejangjaba nung angatetdaksütsü aser Maharashtra indang socio-economic lenla balala tali rajemdaksütsü asoshi liasü.

Iba sentong ya ajanga region balala nungi osangbener tem metettepa shisa lemsatop.

Iba tour mapang parnoki Bandra Bandstand, tekülem ki, cathedrals aser university ama otsü aketba tesemtem semdanga liasü. Parnoki Mani Bhawan, Gandhi Sangrahalaya semdang, koba Mumbai nung Mahatma

Gandhi indang headquarters ama küm 17 jungnüa amshi aser Gandhi asoba anogo akhum agüka liasü.

Nagaland nungi aoba osangbener temi khadi weaving nunga shilem agi aser Bombay High Court aser Bombay Municipal Corporation indang Emergency Operations Center ama tongtipang reju semdang.

Parnoki Gateway of India, Asiatic Library, High Court Art Deco building aser National Museum of Indian Cinema amala tesemtema sema jaja liasü.

Parnoki Wankhede Stadium semdang, koba international cricket stadium ka lir, koba Mumbai Cricket Association meyong lir.

Iba sülen parnoki Worli nung Indian Coast Guard (ICG) Regional Headquarter semdang, kong ICG Charter aser operation inyakyim tongmelang agi lemsatopa liasü.

Osangbener tem den jembidang Commander, ICG Region (West), I G Bhisham Sharma-i Northeast aser talisa Nagaland nungi lanurtem dang ICG nung adentsü aser linük

tenzüüksü ayongzüük.

Parnoki iba sülen Jawaharlal Nehru Port semdang, koba India nung container port tulutiba lir. Iba mapang Chairman, Jawaharlal Nehru Port Trust, Navi Mumbai, Unmesh Sharad Wagh-i osangbener tem dang iba port inyakshangshi indang lemsatopa liasü.

Parnoki iba sülen Malabar Hill nung Raj Bhavan semdanga liasü, koba British nunger mapang yangluba ki alitsü aser Mumbai yimti nung tebour tajungtiba ki ka ama züingshir.

Parnoki Homi Bhabha Center for Science Education semdang aser Olympic nung asayartem den sensaksema maparen balala inyaka liasü.

Nagaland nungi osangbener temi Mathematic Education Laboratory, Aurangabad, Ellora caves, Daulatubad Fort, Panchakki, Bibika Makbara aser Mahatma Gandhi Mission semdanga liasü.

Iba mapang parnoki Himroo Weaving Center semdang, kong kanga nungtugu Himroo sü atakba tenük agi ngua liasü aser iba sülen Auric City aser ano tesem balala sema jaja.

Kohima, Mongputeni/Oct. 10 (TYO): The Entrepreneurs Associates (tEA) ajanga October 26, 2024 nü Kohima nung tanabuba Run to Reforest 2.0 ayongzüksü renemshiba mapang lir, koba dang R2 Run 2.0 ta ajar. Kohima nung aliba tEA office nungi osangbener den jembidang, tEA indang Executive Director Neikule Doulo-i ashiba agi, R2 Run 2.0 ya anepdang 6:00 ako nung High School Junction nungi tenzüüksü aser Secretariat-NU junction ajanga kilometre 9 shi asemer Indira Gandhi Stadium nung tembangtsü.

Taküm iba sentong nung category 14 alitsü aser yangji tetsür aser tebur atema division tenet alitsü, ta lai ashi.

R2 Run ya tEA indang flagship program 'Trees for Wealth' (TFW) nung tongtipang shilem ka lir, koba November 22, 2019 nung tenzüük, ta lai ashi.

TFW movement yagi 2050 tashinung süngjang atangba süngdong billion ka aser süngjang matangba (trees of economic value) billion ana atemtsü nükjidong lir, aser tang tashinung tEA ajanga süngjang atangba süngdong 7.5 lakh aser süngjang matangba süngdong 16 lakh Nagaland, Manipur aser Arunachal Pradesh nung temogo, ta Doulo-i ashi.

R2 Run ya tzi mopung aser libajen asoshi nüburtem nem awareness agütsütsü asoshi lir, ta ashi.

tEA operations supervisor

Chunjanglu Gracy-i iba asemtepa nung sempet telemsa balala indang ashi.

Athletic Professionals nung mezüngbuba nem sen 25,000, tanabuba nem sen 15,000 (tetsür/tebur), Working Professionals nung mezüngbuba nem sen 15,000, tanabuba nem sen 10,000 (tetsür/tebur) agütsütsü. Category ana atema registration ya sen 1,000 alitsü.

College & University category nung mezüngbuba nem sen 10,000, tanabuba nem 7,000 (tetsür/tebur) aser registration fee sen 500 alitsü.

Arishi küm 14-17 atema mezüngbuba nem sen 8,000, tanabuba nem sen 5,000 (tetsür/tebur); arishi küm 11-13 atema mezüngbuba nem sen 3,000, tanabuba nem sen 2,000 (tetsür/tebur) agütsütsü aser arishi küm 10 nungi tekübok pur atema mezüngbuba nem sen 3,000, tanabuba nem sen 2,000 (tetsür/tebur) agütsütsü. Item category asem atema entry fee sen 300 alitsü aser iba parnok atema IG Stadium track nung dang alitsü.

Iba den külemi organizer temi Wheelchair Athletes category atema balaka IGS track nung ayongzüksü aser mezüngbuba jenjang angur nem sen 5,000 aser tanabuba jenjang angur nem sen 3,000 (tetsür/tebur) agütsütsü aser entry fee sen 300 alitsü, ta metetdaksü.

Jangra alirtemi iba anogo masemdang on-spot registration agitetsü, ta laisa ashi.

C-Edge College nung Mental Health Day amung



Dimapur, Mongputeni/Oct. 10 (TYO): Department of Psychology, C-Edge College ajanga Mental Health Day nungtem nung October 9, 2024 nü exhibition sentong ka ayongzüka liasü, aser ibai kaketshir aser tesayur nem jenjang aketba psychoeducational resources agütsütsü nükjidong nung ayongzüük.

Iba exhibition ajanga mapa

inyakba tesem nung tekolok anema aser junga alitsü tongtipang ta asüba angatetdakja liasü. Mapa inyakba tesem nung mental health dak sendakba timtemji anxiety, depression, substance abuse aser obsessive-compulsive disorders amala ya lir.

Department of Psychology nungi kaketshir temi psychoeducation dak

sendakba nung osang balala agütsüba stall tem lapoka liasü. Iba sentong nung tesayur, college ketdangsür aser department balala nungi kaketshir liasü aser parnoki mental health asoshi angateta aliba tendanga liasü.

Iba sentong nung art therapy sessions, created mood boards amala agia shilem agirtem tajangzüük balala angur.

Lanuinla-i züluba sangro kaket 'On Being Feminine' saya



Lanuinlai züluba 'On Being Feminine' sangro kaket Ao Senden tir, Marsanen Imsongi sayatsüdang.

Mokokchung, 10th Oct (TYO): Lanuinla-i Engraji nung züluba 'On Being Feminine' ta sür sangro kaket ka Oct 10, 2024 nü Urban Café, Mokokchung nung Ao Senden tir, Marsanen Imsongi-meraketa sayatsüogo.

Iba kaket tapu asem küma lemsar sangro 30 shi keta lir. Iba kaket nung Senate of Serampore College nung Registrar - Rev. Dr. Limatula Longkumer, Poet & Educator, Intellectual & Fashion Icon - Dr Theyiesinio Keditsu, Ungma Baptist Arogo nung Assoc. Pastor (W) - Rev. Talijungla Longkumer aser Oikos University, California nung Assoc. Professor - Dr. Zulunungsang Lemtur parnoki o meten balala zülutsüba angutsü.

Sangro zülur Lanuinla ya Süngratsü tsür, M.A (economics)

aser M. Th (Old Testament) zünger tang la Everest Theological Institute (ETI), Kathmandu nung tesayur mapa teinyakdak lir. Iba sangro kaket ya tetsürtem dak rangloker tia balala ajangshiba indang züluba lir.

Kaket zülutsübaaji Tsüingremi moatsüba sempet tajungtiba rongnung ka lir. Kaket azüngba ajanga nüburtem tajangzüük anguba den alima melenshidaktsür. Tetsürji kibong aser lokti ajak nung tongti nüktang lir, iba kaket ajanga tetsürtem dang masü teburtem asoshia leniba ajok ka südakjangma ta kaket sayatsüri moaja metetdaksü.

Iba sangro kaket T. Arenla Aoi meshiteta sarasademtsü. Kaket jenjang senpak 199/- lir aser memenui kaket ayokdak angutsü.

East Asia senden ajanga ASEAN den tesendaktep tajungba akümer: PM Modi



October 10, 2024 nü Vientiane, Laos nung Buddhist putirtemi Ato kilonser, Narendra Modi moatsüdang tangokba noksa nung angur. 21buba ASEAN-India senden nung adentsü atema Ato kilonser Modi Laos-i oa lir.

New Delhi, Mongputeni/October 10 (Agencies): Brihostibarnü Ato kilonser, Narendra Modi ASEAN-India senden aser East Asia senden nung shialem agia adentsü atema New Delhi nungi apusoa Laos-i ogo.

Delhi nungi apusoa aotsü jakdang Ato kilonser Modi-i, item senden ajanga ASEAN linüktem den tesendaktep ano tajungba akümtsü, ta metetdaksü.

Paisa, India-i Act East policy tenzükba sülen taküm küm 10 ajungtsü, ta metetdaksü.

“Ni ASEAN lenirtem den külemi Comprehensive

Strategic Partnership jenjang asadangtsü aser tarutsü nung maneni amalitepa inyaksü asoshi asalentong yanglutsü. East Asia Summit ajanga Indo-Pacific region nung yimjung, tesünep aser azükaru alitsü asoshi o lemteptsü atema maongka angutsü,” ta Ato kilonseri metetdaksü.

Modi-i, India-i Lao People’s Democratic Republic (PDR) densema region nung aliba linüktem den sobaliba aser terenlok tsütsü tesendaktep tajung ayur, ta ashi.

“Linük ana (India-Laos) tsüngda tesendaktep tashi itshitsü atema ni Lao PDR

lenirtem den senden amentsü yongyar,” ta pai metetdaksü.

Paisa, “Taküm ya kanga tongtibang küm ka lir, kechiyong asen Act East Policy tenzük küm ter ajunger, koba ajanga asen linük nem tajangzük aika agütsüogo. Laos semdangba mapang nung linük balala nungi lenirtem den senden amentsü aser shisa lemsateptsü,” ta metetdaksü.

State 13 nung sorkar school tem nung tanurtem kanga ajema kümogo

New Delhi, October 10 (Agencies): Union Ministry of Education-i, 2023-24 küm states aser union territories 13 nung sorkar school tem nung class 1 nungi class 8 tashi nung azünger tanurtem kanga ajema kümogo; Uttar Pradesh nungbo yaküm sorkar school temnung azünger tanur lakh 28 ajema aküm, ta metetdaksü.

Pradhan Mantri Poshan Shakti Nirman (PM-POSHAN) scheme (midday meal scheme) asadangtsü asoshi state kettangsertem aser Project approval Board (PAB) na senden amenba mapang nung item osang ya metetdakja liasü.

Sorkar school tem nung class 1 nungi class 8 tashi nung azüngertem state balala nung yamai ajema aküm- Uttar Pradesh nung student 28,69,670 ajema aküm, West Bengal nung 3,70,719, Karnataka nung 2,82,012, Telangana nung 2,25,000, Jharkhand nung 2,23,690, Haryana nung 1,55,000, Kerala nung 1,32,941 aser Madhya Pradesh nung 1,14,374 ajema aküm.

Yaküm Himachal Pradesh nunga sorkar school tem nung azünger kaketsahir 21,000 ajema aküm, Tripura nung 15,527, Nagaland nung 10,000, Mizoram nung 9,889 aser Puducherry nung school tanur 6,236 ajema aküm.

State balala nungi kettangsertem sorkar school

tem nung tanurtem ajema akümba kuli balala metetdaksü. Item rongnung coronavirus wara sülen nisung aika yimtsüngtem nungi yimitemi tanaben meyipa aruba aser wara mapang senotsü agi timtemba agi private school toktsür sorkar school nung azüngertem joko tanaben private school-i aoba agi lir, ta metetdaksü.

2022 küm Central sorkar indang Unified District Information System for Education (UIDSE+) report ajanga ashiba agi, coronavirus wara mezüng küm (2020-21) India nung kaketsahir million 4-i private school tem toktsür sorkar school tem nung azüng.

Jharkhand nung school education department-i, wara mapang tsürabur aikati private school tem nung fees magütsütetba agi sorkar school tem nung züngdaksü, saka wara süngjemba sülenbo tanaben private school-i yok, ta metetdaksü.

Karnataka nung school education department kettangsertem, tsüraburtemi pei chirnurtem English medium school nung züngdaksünüba agi Lower Kindergarten aser Upper Kindergarten nung züngdaksür, kechiyong sorkar school tem nungbo Kindergarten mali, iba kuliji ajanga sorkar school tem nung tanurtem kanga ajema akümer, ta metetdaksü.

Kerala assembly nung ‘One Nation, One election’ anema bangzüng agizük

Thiruvananthapuram, October 10 (Agencies): Brihostibarnü Kerala Legislative Assembly nung ‘One Nation, One Election’ anema bangzüng ka renema agizükogo.

Assembly nung Parliamentary Affairs Minister, MB Rajesh-i bangzüngji benoka liasü. Senden nungji Chief Minister Pinarayi Vijayan bo temang majungba agi medentet.

Iba bangzüng benokdang Rajesh-i, one nation, one election ya India temzüng nung aliba tangatetbatem anema lir, ta metetdaksü.

Paisa, iba telemtetba agiba ya BJP aser RSS-i yimsüsüba centralize asütsü aser India nung federal inyakyim raksatsütsü atema lir, ta aitsü.

“Election nung sen tali indoker, ta shia iba kuli kija

Changtongya Town Baptist Arogo
P.O.Changtongya, 798613, Mokochung: Nagaland, India.
Email: ctbaoffice16@gmail.com
Changtongya Town the 2nd October 2024

11th - 13th October 2024 Home Coming Revival sentong nung atentsü pelashishia jaoker

Temeim Changtongya Town sangertem,

Tamasa ajak dangi Yisu Khrista temeim salem abener. Tanü iba sangdong ajanga Changtongya Town sanger ajak dang nungdak ka lemsateper. 2022 küm Changtongya Town Baptist Arogo nung Laishir senden akadang Tsüngremi Laishir mulungjang nung Home Coming Revival sentong ka akatsü atema jemi. Iba osangji Arogo den tongtepratep aser Arogoia mulunga 11th -13th October 2024 anogo akatsü sentong yanglur Sarasadema atadagi. Iba sentong ya Changtongya Town Baptist Arogo nung telidakpur aser Changtongya Town sanger bendanglen prokshia oa alirtem ajak asoshi lir.

Iba ama sentong ya teti mekatettsü, mapang ka nung ken dang katetba sentong asünung, talisa Changtongya Town sanger bendanglen prokshia oa alirtem aser ano oda Changtongya Town nung ken danga lidanger aortem ajak medema arua atentsü Arogoi aser Lashirtemi pelashishia jaoker. Nisung kar tanendak maka koda masür lira agüja aliba contact number 9077885730 nung tongteprateptsü mepishir, nenok asoshi tajungtiba renema lir.

Nisung shia kija taküm, kibong aser lokti nung nungdak aika lir, itemji asenok asoshi teti inyaka aotsüba nungdaktem, saka Home Coming Revival sentong yabo taküm nung ken anga ajuruba sentong ka asütsü akok. Anungji nübertem ajak arua iba sentong nung tena temoatsü angutsü Sarasadema atar.

Kibuba nung,

(REV. TEMSHI PASTOR)
Changtongya Town Baptist Arogo

nungji ajemdaker Parliament, state assemblies aser local self-government bodies election ajak külemi dang agitsü benokba ya democracy anema lir. Iba ya India nung sobaliba, loktiliba aser yimtenren takar raksatsütsü merangba lir,” ta paisa metetdaksü.

Mannarkad MLA, N Samsudheen leniba nung opposition-ia iba bangzüng pusema liasü.

United Democratic Front MLA-ia One Nation One Election ya state sorkartem aser democratic inyakyim atema amokmeren lir, ta ashi.

Tang linük nung party 15-i One Nation, One Election ya anema nokdang, aser item party rongnung Congress, Trinamool Congress, Communist Party of India

(Marxist), Communist Party of India, Dravida Munnetra Kazhagam aser Samajwadi Party den regional party aika densema lir.

Taoba ita BJP-i aniba NDA sorkari ‘one nation, one election’ mapa küma benoktsü atema mera ka agia Union Cabinet-i Ram Nath Kovind-i aniba committee-i benokba report agizükogo.

Taoba mapang linük Tir, Ram Nath Kovind-i aniba committee-i taküm March ita nung Tir, Droupadi Murmu nem committee report agüja liasü.

Committee-i Lok Sabha elections aser state assemblies elections külemi mapang ka nung dang agitsü, iba sülen anogo 100 tsüngda municipalities aser panchayat election agitsü benoka lir.



October 10, 2024 nü Mumbai nung RBI Governor, Shaktikanta Das den tangartem business lenir, Ratan Tata nem akhüm agütsüdang tangokba noksa nung angur. Taoba mapang Tata Group Chairman Ratan Tata Bodhbar aonung Mumbai nung aliba hospital ka nung süogo. Pa arrshi küm 86 liasü.



TIR YIMYIM YIMOBILEM (EDITORIAL)

DIMAPUR ROGONÜ, OCTOBER (MONGPUTENI) 11, 2024

Mera Nija

Ao kin asoshi tsük lu ayimba ya chiyongtsü züsenba mapa ka dang masü saka teyari agütsüba aser temeim sayuba mapa ka lir. Aji oda, alu nungi chiyongtsü dang masü temeim aser telongjem adoker. Ashiko, tanü asenok aikati tsük lu mayimba agi teyaritepdak aser temeim sayudak maka temeim mekongga aküm asütsüa akok. Iba ama mapang ka, yakanü Longsa nung yimten yimsüsür kibong kati yimer ajak par alu arotsüba mapa agi benjong kümer, aluro benjong, Mera Nija jaoka benjongtepba sobalibaji, atangji, kanga meraketa reprangogo. Asenok aikati Moatsü, Tsüngremmung aser Süchiba benjong indang metetba dak alaka 'Mera Nija' benjong indang yabo mangashi aser memeteti alitsüa akok. Aji oda, Aor aluyimba sobaliba nung alu kiburi pei lu inyaksü atema adianu kinungertem nija jaoka inyakba sobaliba ka lir. Ajisüaka, ibajibo Mera Nija amaibo masü, kechiyong ibajibo benjong masü saka alu koka inyaksü atema nebo meshia yaritepba sobaliba ka lir. Ibaji kari kenü aser kari kenü ta nija jaoktepba ajaki inyaksü akok. Ajisüaka, Mera Nija-bo ajaki inyaktetba mapa ka masü, ajibo putu nung kibong ka mesüra ana dang adoktsü. Ano, putu kar nungbo shingaia Mera Nija mejaoktettsüa akok, kechiyong iba mapaji temela masü. Ano, Aor sobaliba tajung kaji, kiburi nija mejaaka, kibong kar nung shilumanem timtem agi alu meinyaktet timtema ngura, kinunger- adianu aser kidang-kiyongertemi parnoksa mulungteta ayongteper pei pei chitem agi timtema alir aluji inyaksür. Iba dangji Ayongtepa ao ta ajar. Ibajibo benjonga masü aser yangyuba mapa kata masü saka peisasa rajema angati temeim mapa inyakba ka dang lir. Item ama sobaliba tajungtem ya tanü putu nunga asenoki mesendoki kati ka yaritepa otetra, iba jagi asenok meteta aser memeteti longjemer alitsü. Asenok Aor sobaliba nung süchiba aser Mera nija benjong amongbatem ya taka-tait toktepba benjong ka dangbo masü saka pei meranga inyakba ajanga Tsüngremi moatsüba nungi mulungsua nübertem den lemsatepa pelateptsü yangluba benjongmung sentong lir. Aji oda, süchiba benjong nunga süchir akaba ajak yimtsür yimertem den dang masü saka tangalen nungia tembartem jaoka chiyonga jema pelateper. Kasaji, Mera Nija nunga yimer ajak jaoka külemi pelatepa alu ror külen alu nung chiyongbaji dang masü saka tarur shia nem kidang kinunger chishia asütsüsa shimelang aser shitu bener yoker. Ano, süchiba aser Mera nija benjong dak aketba mapa tasakji benjong anogo aser mapangji matongdangyongi küm junga apuani tsüngda anempong tenzüktsü aser peisasa pei shi azü aser tebang temeli azüoka alitsü aser külenang Moatsü aser Tsüngremmung shia nashi ak tepseta kinunger adianu aser yimtsür yimertem den benjong mongteptsü. Item ajakji koktettsüsa alu mapa nung meranga inyakba aser peisasa pei taküm azüoka litetbaji, shiba südir sang, taküm nung takok kanga tulu lir. Aji oda, süchir aser mera nija benjong agütsür nem ken mejema tentsüba aser abensüoshia balaka taaka abendaktsüba konang nungsang ajakji parnok mapa agi kanga temsüa lir. Item akhi süchir aser Mera Nija jaokertem den tanü asenok taküm mapa aser libaliru medemdangra, asenokbo kanga menena lir aser asen akayonga asen akaba agi süchitsüa malang aser mera nija jaoktsüa metemsü. Atangji, tanü asenok akaba agi benjong agütsürtema aika lir saka asenok rongnunga teimbaka pei inyakba rongsen masü saka meinyaki anguba rongsentem agi benjongteper asütsü. Aji oda, asenok rongnung takar aika alitsüa akok, saka shibaibo küm junga anemponga lir külen pei akaba rongsen ajak endoka yimertem den pelatepa mongnüsü? Kasaji asenok takar aika lir saka shibaibo belema tsük lu yima arur, anemponga, Mera nija benjong agütsütetsü? Koba kin aser lokti nung südirsüaka ajak takar makümtsü saka ishika takar akümertem jagi pei akaba rongsen agi nübertem den mekorui lemsateptsü bilemra, atangji, ibajiang taka shizüka asütsü aser par lima aser yimkong nung nübertem longjema alitsü.

OLEMSABANG

NOKYU MAJUNG METJI

- P.Renthy Jamir.

(Maneni yashi adok nungi...)

Settlement tetezü mangatettepi lia aruba tatebang küma lemtet agiba (the decision which ends a dispute) Item tashi temeteterem kwiben meta balala nungi nübusa nübu tsüka rongsen jenti lalua sentepi " Ozü nübur nai kotak nungi reprangzüka yokangma ta sarasademli tenzükli ta asüba meeting kwiben mener alitsü ta bilemer. Saka sayutsüngiri, "Ibaia amajok aser mopung sulen toktepba ka dang" ta ashiba ama tamakitsü tazüngla ka dang liasü. Teni tsüker nüktzü alur yagi arogopur ajak nüken nüktzü atener aser arogo nung tematibaji sannüker lir anungji parnok inti jazükdi tasür jazük. Saka sannüker mungdang memesük parnokia tatok taremsük tai toktepba agi masü longkotem ka lemteter might is right tasür senshi. Kechiyong asenok Nokyu majung metjia lir aser Lai nung " Na kong nungi tsük aji bilemtetang" ta ashiba mebileteter. Tangar Hindu Muslim Yimsü amangertembo küm 70 tashi mangatettepi ozü tama ozü meyong ta nür tesü ta raktepa aruba Ramjanmibhoomi Babri Masjid in Ayodhya Tekülem tenla kimong atema ken O tatem kati arua 9th Nov 2019 nung O bendanger nisung pungoi tatebang O lepdang case tezülutepba tapak (page) 1045 nung züludenba nungi Chief Justice Ranjan Gogoi yamai ashi "Enough is Enough" "periogo ojang sang" tasür tang atsütepba tesem Ayodhya nungji Hindu is Enough" "periogo ojang sang" tasür tang atsütepba tesem Ayodhya nungji Hindu nunger tenla ki süang aser Muslim nunger tenlaki asütsü ali acres 5 agüjang ta case tembangtsü. Yimsü balala amanger ana ya ali kimong ka atema (a piece of Land) küm paikaji yimjung mekai lia aru. Yangi otsü ka bilemteter Unger yimdak Longkümer O lmsongunger na tenüng ka agi raktepa Süzumatong ajatsü yimdak caseji metembangtet. Longkümeria sü tulu ka achi lmsongungeria sü tuluka achi.


Anungji Mokokchung nung Head Dobashi Imnameren alidang (1914-1917) o akatsü atu Imnamereni oji angadanger sü tezüji kaka bener atung ta ashi pai ashiba amaji sü tezüji bener tua sayu nung Longkümeri achiba sütezüji tuluba liasü. Anungji O bendang yamai agütsü Süzumatong tenüngji Longkümer jang aser lmsongunger Süzumar tenüng jaang. Tenüng ka raktep saka tenüng tajung kasa ana anguba tanü tashi Unger nungeri item tenüng ajar. Aser kin anaprongla putepputepa yimdak azükarua temoatsüma nung alir yamaji ken O yimdak metembangteti pi dangi ao saka tangatettep ajak atema temoatsüang bener aru. Asenok ABAM-a asen saseb nung yimjung Committee-i takok mangu ano Settlement Committeeia tamakok nung tembang. Aser tang asenok shinga mermeshi magitsüsa Tsüngremmer sentong iba mangatettep ken O court nung lir ta angazüker. Aser Tsüngrem tsüngdangbo kecha tamakoktsü mali. Tangar Hindu Muslim yimsü amanger küm paikaji mangatettepi case page 1045 tashi zülutepba tatebang küma angatettep süra shibai metet asenok case yabo page 250 tashi ang asütsü sudi ta bilemer.

Tanü tangatetba putu ka nung alir asünung nübur tsüngda mangatettepi aruba ajak angatettepa aor governmentia Lok pal ta Lok Ayukta ta ozüng yanglur mapangshia district ajak nung ken O anendaka alibatem tatem kümtsür. Tang Nagaland nung joko Tsüngrem angatetba agi Dobashi Court nung case kata bener marur aser lawyer hire asür shianga mali ta ashir. Anungji asenok Aor Baptist arogopura tang koba ken O asenoksasabo bendangtsü tamakoktsü asüba tia lia court nung tepdaka lir iba ya tekaratiba nung tangar amaji tatebang kati arudakjang ta Tsüngrem dang lumia sarasademtsüla. Kechiyong asenok ochi nung lira Tsüngremibo temeshipur kodanga alashia metoktsür. Iba case atema ABAM aibelentsü kecha mali, tetsübuttsü kecha mali, teloki courti maotsü lemtetba ama ajemajema alitsü yangi courti ABAM lenirtem jaili aotsü ta mesüra senchi sen lakh paikaji agüjang ta O bendang magütsütsü ta bilemer, anungji kecha nükena bilemtsü mali. Yamaisa lia alima atemtsü masüji tarutsü putu nungbo alemli amato arogopur tsüngda putepa alitsü atema dang courti O bendang agütsütsü ta bilemer.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Museum of the Bible (MoB) nung Ibri nunger kaket tejentiba sayar



Washington D.C nung aliba Museum of the Bible nung 'Afghan Liturgical Quire' kaket sayaba noksa nung angur.

Washington D.C, October 10 (Agencies): Afghanistan linük nung Yihuda nunger kaket tejentiba rongnung ka anguba sülen tang iba kaketji Museum of the Bible (MoB) nung sayadar; iba kaket nungji Tejen Lai nung aliba Lai tekongtem nung ajemdaker renemba sarasadem aser sangrotem keta lir, ta osang ka ajanga metetdaksü.

'Afghan Liturgical Quire' ta ajaba kaketji küm 1,300 shi tejaklen züluba lir. Inch 5x5 kaket nungji sarasadem aser sangrotem keta lir aser iba kaket ya Haggadah version rongnung tejentiba lir, ta research agirtemi bilemer.

Süia aoba benjung mapang Seder nung azungba kaketem dang 'Haggadah' ta ajar.

Taoba ita Museum of the Bible-ia kaket densema sayaba exhibit tasen ka semzükogo aser iba exhibit dangji "Sacred Words: Revealing the Earliest Hebrew Book" ta ajar.

Iba exhibit ji September 24, 2024 nü lapok aser sangküm January ita tashi Museum nung alitsü.

Ibri oshi nung züluba kaket nung sarasadem aser sangrotemji Ibri Laishiba nungi agitetba lir. Iba kaketji Bamiyan Valley yimsüsürtem Buddhist nungertem rongnung nütsüng ishika dang aliba Yihuda

nungertemi yanglu. Bamiyan Valley dang tang Afghanistan ta ajar, ta Museum of the Bible-i metetdaksü.

Osangbener den jembidang Museum of the Bible nung Associate curator of Hebrew manuscripts aser exhibit tasenba nung Curator, Herschel Hepler-i, anüolen aliba linüktem aser osangbenertemi Afghanistan nungertem indang chichiba sobaliba memetet, ta ashi.

Paisa, tesüiba küm meyirjang aika Khristantem, Yihuda nungertem aser Muslim nungertem Afghanistan nung tesünep nung ali; Silk Road mapang nungi Afghanistan nungertem dak taochi liasü aser tejungnü liasü, ta metetdaksü.

Afghanistan ya maneni raraba aser tensa mejungi aliba linük ka süaka iba linük nung nüburtem dak aria meimba shisatsü lir; exhibit tasenba semdangertemi Afghanistan nungertem indang sobaliba tali tajungba angatetsü, ta Hepler-i ashi.

"Nia-a aika angatetogo aser iba exhibit semdangertem-a ajaki Afghanistan nunger puti otsü junga angatetsü, ta ni amanger," ta Hepler-i ashi.

Sacred Words exhibit nung Curator, Hepler-i küm 8 tashi 'Afghan Liturgical Quire' kaket research agia liasü, iba sülen iba

kaket renemtsü atema küm 2 tali agi.

1997 küm Afghanistan nung Hazara nisung kati iba kaket ya lungki ka nung angu. Hazara nungertem ya Afghanistan nung nütsüng kanga ajema aliba lisopurtem lir. Iba kaket anguba sülen 2001 küm tashi parnoki iba kaket wazüka ayu.

2013 küm Hobby Lobby chain kibur aser Museum of the Bible amenokba nung yariteper, Green kibongi Israel nunger ka dang iba kaketji alizükba sülen 2015 küm parnoki iba kaketji Museum of the Bible nem agüja liasü.

2018 küm nungi 2021 küm tashi Museum of the Bible-i research project ka tenzük, aser iba nungji Afghan Yihuda nungertem, Afghan Jewish Foundation aser American Sephardi Federation-ia shilem agia liasü. Taoba mapang Afghanistan sorkaria iba project nung yaritepogo, ta Hepler-i metetdaksü.

Hepler-i, 2020 küm coronavirus wara agi Afghanistan kanga mejungi kongshi aser 2021 küm United States-i par sepaitem Afghanistan nungi aienshiba sülen Taliban-i sorkar atsüngdoker sorkar tasen tenteta liasü, ta metetdaksü.

Coronavirus tensa majuru asübo kaket tasenba sayaba exhibit ji yakta semzükur lila.

Milton yipru lendong nungi Tampa Region kümzüktsü sarasadem

October 10, 2024: Khristan lenirtemi Khristantem dang Florida kübok Gulf Coast atema sarasademjang, kechiyong Milton ta ajaba yipru tesashi agi Tampa region kongshitsü, ta metetdaksü.

1921 küm sülen nungi tang tashi Tampa region nung yipru lendong tulu matalok, ajisüaka taruba Bodhbar aser Brihostibar anogotem nung Hurricane Milton tzüküm atongtsü, aser iba mapang nungji mopungji ghonda ka nung mile 150 tashi kera aontsü.

Hopta ana tejaklen-a

Hurricane Helene agi Florida kongshia liasü.

"Iba ama yipru tesashi agi, tawa lendong ajurur aliba Florida mejungi kongshitsü, anungji parnok atema sarasademjang," ta Khristan melungtet telok Samaritan's Purse nung Tir aser sayutsüngir, Franklin Graham-i metetdaksü.

Southern Baptist relief organization Send Relief nung Tir, Bryant Wright-ia Khristantem dang iba yipru tashi meiti akümstü atema sarasademjang, ta mepishi.

"Tsüngremi iba yipru tashi

meiti kümdaktsütsü atema kü den külemi sarasademba nung shilem agiang. Galilee tzüyim nung Yisu-i yipru süngjemdaksüba ama yipru tesashi süngjemtsü atema sarasademjang," ta Wright-i metetdaksü.

Wright-isa, "Iba yipru yagi nütsüng aika aliba tesemtem kongshitsü, aser taküm aika samatsüa akok," ta metetdaksü.

Tamba ya Florida kübok yimti tulutibatem rongnung tasembubajenjang nung lir, aser iba yimti nung tang nisung 400,000 shi lir.

ANOGO ABEN TSÜNGREM DEN

Nai kechi metet nai inyaka lir ma?

Anungji shibai mapa tajung inyaksü metetter aser meinyaker pa asoshi aji temenen.

Yakob 4:17.

Tsüngremi mulungba metetter meinyakbaji mapa tila masü. Iba dang Tsüngremi temenen ta ajar. Asenoki tashi mangaba kulitem yanglutsü akok: "Ni ano renema mali asü" mesüra "Ibai kecha balaka masü ta ni bilem" mesüra "Ni tesülen inyaka" mesüra "Ni memerangtet!" Asenoki temeten kuli yanglur, asenoki mapa menua inyaker, aji saka Tsüngrem nükdang temeten kuli aser mapa nung menuba tashi mangaba dak alema tanga kecha mali. Tebilemba tajungji tashi angaba mapa den kasa ta asenoki bilemba agi asenok pei sasa ashioktsür. Aji oda masü. Mapa mali tebilemba tajungji tashi mangaba den kasa lir. Kodang asenoki Tsüngrem den ajuruteper aser Pai asenok nem tetuyuba ka agütsür, asenok tanela ainlen jajaba nung züluokba mesüra asenok tembartem aser arogo dang asen "telemtetba" ashibaji teperi masü. Tsüngremer tajabaji "telemtetba" ka agitsü atema masü saka tashi angaba den kasa masü (Mat. 21:28-31). Tashi angatsü nüngdak ta akangshibaji tashi angaba den kasa masü (Lk. 6:46). Takok matsüngdang asen bendanga agütsüba kuli ashibaji Kibuba dang tashi angaba den kasa masü. Mapa tajung inyakbajia tashi angaba den kasa masü.

Tsüngremi chuba Saul dang ainakar maru tashi ataa alitsü ashi. Atatsü melen Sauli mapa ajak pa ket nung agi aser tarungba tenla agütsü. Tanga mapa tajung Sauli inyakbaji tashi angaba mapa masü liasü ta Sauli metetta aru (1 Sam. 15:22). Saul dang ama, Tsüngremi ashiba shidakji inyaksü Pai na nungi imlar. Tashi angaba agi dang Tsüngremi aginüba tashi angaba ataloktsür.

US Tir election nung Khristan million 41-i vote magütsütsüa akok

October 10, 2024: Taruba ita November nung US Tir election nung Khristan million aikati vote magütsütsü tebilemba lir, ta survey tasen ka ajanga bushitetogo.

Arizona Christian University nung Cultural Research Center-i agiba survey nung shilem agir shilem 51 bo yimsü balala amanger Khristantem, Yihuda nungertem mesüra Muslim nungertem liasü, aser parnoki taruba ita taoba mapang Tir Donald Trump mesüra tatong Tir Kamala Harris nem vote agütsütsü, ta shiogo.

Ajisüaka yimsü balala amanger nisung million 104-ibo taruba election nung vote agütsütsü tebilemba mali ta shiogo, aser parnok rongnung Khristan million 41 densema lir aser iba nungji Tenla kidangi teti aoer million 32 densema lir, ta survey ajanga bushitet.

Arizona Christian University nung Tir aser taoba mapang Arizona Governor atema Republican nominee, Len Munsil-i, "Mezüngbuba nung, federal aser state balala

nung telemtetba agirtemji (lenir shimtsüpurtemji) Khristantem asütsüa akok, saka parnoki yamaji masütsü lemteter. Tanabuba nung, parnoki pei adenba Arogotem nem Laishiba nung ajemdaker tetuyuba agütsüdaksüner," ta metetdaksü.

"Parnoki (Khristantem) koma vote agütsütsü, ta masü saka kechiba vote agütsütsü aser Laishiba nung ajemdaker yimtenren onüktem koma angatetsü, ibaji metetner," ta paisa ashi.

Taruba ita Khristantem aikati vote magütsütsü; vote magütsütsü tebilemba alir Khristantem shilem 68-i yimtenren nung mejangrar ta ashi, shilem 57-i tongti party ajak nungi candidate tem mesakloker ta ashi aser shilem 52-i parnoki vote agütsüyonga kecha balaka masütsü ta ashi.

Iba survey nung shilem agia telangzüba agütsür nisung ajak senteper 3,000 liasü. Iba survey ya shilem ama lemsar August aser September ita na nung agia liasü.

AO OSHI ANGAZÜKDAK:



Tanü

* Tanü anogo ya Rogonü lir.

Tanü

(adj) kanga tanemi inyakba yimya (very slow act, sluggish)

* Pa mapa nung kanga tanü asüba agi anentsü.

OLONG PAITEP # 6949

Grid for Olong Paitep # 6949 with numbers 1-24 in a 5x5 layout.

TIPIEN

- 1. Saku - (4)
6. Songjen - (7)
7. Mali/Tazüing - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüing kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüingdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. ___ tatsü - (3)
12. Tebur kidong aser zünga kasatsüingdajatepba - (4)
14. Pela agizükba tapu ka - (5)
15. Tenüing atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6948 TELANGZÜBA

TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem, 15. Tambu,
16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok, 12. Amang,
14. Jala.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüing :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Assam Rifles-i "Breaking The Silence Campaign" agi



Dimapur, October 10, 2024 (TYO): Assam Rifles-i October 10, 2024 nü Patkai Christian College, Chumukedima nung Breaking The Silence Campaign ayongzüka agiogo.

Iba sentong ya Assam Rifles-i Aid Care Trust Support Foundation, Miss Northeast 2023 Miss Kenei Ritse, Miss Nagaland 2023 Miss Neiketuno Sechü aser Miss Nagaland 2022 Miss Hikali Achumi nunger den yaritepa ayongzüik.

Sentong nung Major General

Manish Kumar, SM Inspector General Assam Rifles (North) tongti tesemdang liasü.

Major General Manish Kumar-i onük jembidang drug abuse aser mental well being nung shilem agitsü ayongzüik.

Miss Northeast 2023 Miss Kenei Ritse, Miss Nagaland 2023 Miss Neiketuno Sechü aser Miss Nagaland 2022 Miss Hikali Achumi nungeria drug abuse indang onüktem jemi.

Sentong nungsa Aid Care Trust Support Foundation

Director Burakum Ao-i drug achiba, noktangba, anepaluba aser drug addicts yariba indang kaketshirtem den lemsatep.

Assam Rifles-i war on drug abuse kanga meranga inyaker ta Burakum-isa ashi.

Iba sentong nung shilem ka ama Major General Manish Kumar-i bike rally ka tenzüksü.

Iba rally ya drug abuse indang osang prokshitsü atema agi aser Tetso Motorcycle Club o Patkai Christian college kaketshirtemi shilem agi.

Taoba Manipur CM Ibohi Singh-i Centre sorkari aitsür

Imphal, October 10, 2024 (Agencies): Centre sorkari Manipur tebilemtsü atema temulung magütsür aser iba atema parnok miim tebilemba ka alitsü akok ta taoba Manipur Chief Minister Okram Ibohi Singh-i aitsüogo.

Congress Bhawan nung Indian National Congress (INC) nung züingsemba lennir 9 pelashishia agizükba sentong ka nung pai iba osang metetdaksü.

INC züingsem tasemtemji L. Jayantakumar Singh, Ex-MLA & former NPP candidate; O. Romen Singh, former NPP candidate; A. Okendra Singh,

Ex-Z.P. Member; L. Dhiren @ Bobo Singh, social worker; Th. John Singh, retired government employee & former Secretary & President of JAC of AMTUC and AMGEO; L. Gyanendro @ Boi Singh, Ex-Councillor from W/No. 15; R.K. Sachi Singh, Ex-Councillor; O. Nilachand Singh, Member from W/No. 17 aser L. Romen Singh, Member nunger lir.

"Khuret shia atema telemteba ka lir aser Manipur tebilemtsü ya koktettsü. Centre sorkari mangatettep anendaktsütsü atema shilem agitsüla saka magir" ta Ibohi

Singh-i ashi.

Home Minister Amit Shah lia political party ajak senden ka amendang Ibohi Singh-i Meitei aser Kuki nunger ket nungi prangpong-injang ajak agitsü shidanga liasü.

Iba sülen yimtenren olemtep tenzüksü ashi saka sorkari tang tashi nung iba mapa meinyaker ta Ibohi-isa ashi.

"Alima nung Indian army ya jenjang pezübuba nung lir saka India sorkari Manipur khuret mekotteter" ta pai ashi.

Manipur state sasep nung kintemi administration balaka meshiba Centre-i magizüktsüla ta Ibohi Singh-isa ashi.

Garohills nung zümetsüing agi nisung lakh 6.51 timtemer



Guwahati, October 10, 2024 (Agencies): Meghalaya nung tzüinglu kanga aruba ajanga Garo Hills nung yimtsüing 246 metsüingbanga lir aser nisung 6,51,083 timtemer.

"Tensa tamajungtiba ka ajurua lir" ta Revenue and

Disaster Management Minister Kyrmen Shylla-i ashi.

Tang tashi nung zümetsüing ajanga nisung 15 süogo aser 6 yirua lir aser ki 347 raksatsüogo.

South aser West Garo Hills nung relief camps aika lapokogo.

Sorkari evacuation & relief efforts nung temulung agütsür ta ketdangsurtemi ashi.

Zümetsüing agi West Garo Hills nung yimtsüing 132 dak kongshiogo aser iba district nung ki 93 raksa aser lendong balala nung nisung 5 asü.

Kamala Harris nūbuyim nung sen \$1 billion alema bendenogo

Washington, Mongputeni/Oct. 10 (Agencies): July ita Democratic party indang presidential nominee akumba sülen US Vice President Kamala Harris-i nūbuyim mapang sen \$1 billion dak tema bendenogo, ta US media ajanga ashir.

Harrai campaign-ibo tang tashi tejangja mashir, saka lai sen \$1 billion dak tema bendenogo, ta The New York Times aser NBC News dang osang balala ajanga ashir. Yangji la indang nūbuyim aser Democratic Party committee tem asoshi dena lir.

Sen aika bendentetba ajanga election nūbuyim tatemlen indoktsü asoshi la den tokteper Republican telok nungi taoba tir Donald Trump dang nungi Harris ket nung sen timba akumer.

August ita Trump aser Republican Party ajanga sen \$130 million bendenteta par telok ket nung sen ajak agi \$295 million liasü, aser iba mapang Harris aser Democrats ket nung sen \$404 million liasü.

Trump-i September ita sen \$160 million bendena aliba Harris-i alemtsü temulung lemteta lir, kechiaser ita asem buba tatemi lai sen \$72 million



bendenteta lir, ta The New York Times ajanga ashir.

Ajisüaka Republicans temi super political action committees (PACs) ajanga sen aika bendenteter aser item telok yagi parnok nūbuyim den tongtepratep mesüi candidates atema sen bendener.

2024 election cycle tenzükter tang tashinung Trump yariba 'largest super PAC' temi Harris yariba 'largest super PAC' dang sen million aika agi timba indokogo, ta ashir

Ajisüaka November 5 nü election magidang tongtipang state tem nung Harris-i

advertisement aser operation nung sen aika bendentettsü imlar.

Polls nung Harris jenjang tera agi tajungba sayur, saka tongtipang states tenet nung Trump tena tepila kangabo majiteter.

InsiderAdvantage for Pennsylvania ajanga poll tasen ka agiba nung item states tem nung points ana agi Trump tajungba sayur.

July ita arishi küm 81 tain Tir Joe Biden melenba sülen Harris-i kanga arsanga nūbuyim tenzük aser senotsü tenlar atsür arua liasü.

Israel-i Gaza school amakba nung nisung 28 asü

Gaza City, Mongputeni/Oct. 10 (Agencies): Rara mechi tesem balala nungi pei ki yutsür central Gaza Strip nung school ka nung jenoka alidak Israel-i tayimtsü amshia amakba nung nisung 28 tepsetogo, ta Palestinian Red Crescent-i ashir.

Rufaida al-Aslamia school amakba nung nisung 50 dak tema yiru ta medical organisation ajanga ashir, koba Deir al-Balah jila nung par indang headquarters anasa lir.

Iba tesem nung tangokba video ka nung nūburtem yirur alir yaritsü asemtepa oa liasü aser tanur aika al-Aqsa hospital nung temang anepaluba noksa nunga nguogo.

Israel mitkari iba school nung Hamas fighter temi ketdangsüa aliba "command-and-control centre" nung mezüng-mezünga amak ta ashir.

Civilian nem timtem magütsütsü mechi parnoki

mera balala agi ta ashi aser Hamas-i civilian indang ki o jen amshiba aitsü, saka iba telok yagi taoba mapanga item taitsüba magizüki liasü.

Gaza nung Hamas meyong health ministry-ia nisung 28 asü ta ashi aser ibai Israel mitkari asaa nūburtem tepsetba maparen tasen ka lir ta ashi.

Küm ka tejkadang Gaza nung rara tenzükba sülen Palestine nunger nisung 1.9 million shi pei ki yutsür jena aoba sülen school ki aika nung jenoka alir.

October 7, 2023 nü Hamas-i Israel south tsütsü maka nisung 1,200 shi tepseter nisung 251 pua bener Gaza-i aoba mechi Israel mitkari iba telok samatsütsü nükjidong nung Gaza Strip makyonga arur.

Tang tashinung Gaza nung nisung 42,060 dak tema tepsetogo, ta iba territory indang health ministry ajanga ashir.

Hurricane Milton-i Florida nung kongshi; nisung 4 asü



Orlando, Mongputeni/Oct. 10 (Agencies): Hurricane Milton ajanga tornado ana adokdakja US anüdoklen Florida nung kongshia nisung pezü asüba jangjaogo, ta ketdangsür temi Brehostibarnü ashi.

Item tornadoes ajanga nisung pezü ajaba jangjaogo, ta St. Lucie County ajanga par website sangdong ka nung ashi.

Hurricane Milton ya Brehostibarnü Florida ajanga tornadoes ama aodang nisung million aika indang ki aser power raksatsür Atlantic leni ao.

Ajisüaka Tampa Bay area nung tzümetsüng tesashi adoktsü ama tsüboa aliba mokongshi.

Florida indang Atlantic Coast nung aliba St. Lucie County nung retirement community ka chireptsüba nung nisung pezü ya asü.

Brehostibarnü Florida nung nisung aliba ki aser businesses million asem dak tema nung power mali, ta PowerOutage.us ajanga ashir. Hopta ana tejkadang Hurricane Helene agi kongshiba sülen nisung aika power yanglutsü yongya liasü.

Hurricane yagi St. Petersburg nung Tampa Bay Rays baseball team indang stadium, Tropicana Field kilem shizüka bener ao, saka nisung yiruba osang mali.

Tampa tesem nung yipru yagi süngdong-lidong laodaktsü, lenmang sünga jana onshishi, power lines raksatsü. Tesem

kar nung tzümetsüng adok, saka iba yimru ano mesüngjema ajanga teraksa masadangteter, ta ashir.

Emergency crews temi teyari meshir aika nem telangzüba agütsüogo aser tesem ka nungbo tanur densema nisung 15 aliba ki ka nung süngdong laoa liasü, ta Tampa Police Chief Lee Bercaw-i ashi.

Mopung sashia aonba ajanga St. Petersburg nung construction crane ka lao, saka yangji nisung kata meliasü.

Tzünglu inch 18 tashi aruba sülen ayong nungi tzümetsüng adoktsü akok ta ashir.

Bodhbar aonung iba yipru yagi Florida indang west coast nung kongshidang Category 3 hurricane liasü aser mopung ya ghonda ka nung mile 120 tashi kera ona liasü. Iba yipru ya tanga lendong keta lir, koba Category 5 hurricane ka asütsü ta sangdonga liasü.

Milton ya alinük ajanga aodang tashi ajema Category 1 hurricane akum aser east coast atongdang mopung ya ghonda ka nung mile 85 tashi ona liasü, ta National Hurricane Center ajanga ashir.

Brehostibarnep tashinung iba yipru ya Florida Atlantic tzükum len nungi ainshir liasü.

Florida-i meshiba teyari ajak US Tir Joe Biden indang administration-i agütsütsü mulungogo, ta Florida Governor Ron DeSantis-i Brehostibarnep ashi.

2024 Nobel Prize in Literature atema Han Kang shimogo



Stockholm, Mongputeni/Oct. 10 (Agencies): South Korea nunger Han Kang-i meimchir takum nung timtem balala aliba indang temai adoktsüba aser tekolok shisatsü timtemba indang sangro züluba mechi 2024 Nobel Prize in Literature takok nguogo, ta iba sempet agütsüba tentet ajanga Brehostibarnü sangdong.

Iba senpet ya Swedish Academy ajanga agütsür, kong sen 11 million Swedish crowns (\$1.1 million) lir.

"Temang aser tanüla, takum aser tasü tsüngta sendaktepba lai kanga junga meteta lir, aser la indang sangro aser lai züluba yimya ya contemporary prose nung mezüngpur akum," ta Nobel Committee indang academu chairman Anders Olsson-i sangdong ka nung ashi.

South Korea nungeri iba

literature prize angurbo Han Kang ya mezüngbuba alitsü aser lai 1993 küm nungi tenzüka Literature and Society indang magazine nung sangro aika adoktsü aser otsü tatsü bendena "Love of Yeosu" nungja agütsür 1995 küm nungi prose azülü tenzük.

Lai "The Vegetarian" novel zülua alimai la meteta akum.

Iba osang mesangdongdang China nunger Can Xue aser ano Kenya nunger Ngugi Wa Thiong'o, Australia nunger Gerald Murnane aser Canada nunger Anne Carson nungeri angütsü südi ta imlaa liasü.

Nobels sempet aika rongnung literature prize ya timbai nguteter, anungji Academy ajanga shimba nung tenüngsang aser taitsüba dena lir.

Academy ajanga Russia

nunger Leo Tolstoy, France nunger Emile Zola aser Ireland nunger James Joyce nunger meshimba ajanga tesüiba aso nung kaket meimer tem ratamata aru.

2016 küm iba sempet ya America nunger kentener aser ken zülur Bob Dylan nem agütsüba ya aikati tushi aser aikati temulung masüba jembia liasü.

Science, literature aser peace atema sempet ya Sweden nunger dynamite ngutetsang aser shishilemar Alfred Nobel indang senmang nungi agütsür. Iba sempet ya 1901 nungi küm shia agüja arur aser tesülen economics asoshia sempet agütsü tenzük.

Peace sempet sülenbo literature sempet nung temulung talo agütsür aser iba sempet angur kakat zülur alimai meteta akumer aser parnoki züluba kakat tem jangratema ayoker.

Taoba mapang Ireland nunger sangro mejemer W.B. Yeast-i 1923 küm, American novelist Ernest Hemingway-i 1954 küm aser Colombia nunger Gabriel Gracia Marquez-i 1982 küm anguba ya alimai tanü tashi züngshir.

Norway nunger kakat zülur aser dramatist Jon Fosse-i 2023 küm iba sempet ngua liasü.

Hopta tetenzüklen medicine, physics aser chemistry indang sempet sangdongba sülen Brehostibarnü literature sempet sangdonger.

November ita Nadal tennis asayaba nungi anisüngzüksü



nung masayatetsü ta sangdongba mapang pa temang nung yiruba ajanga 2024 küm tatem anisüngzüksü sentong lir ta shia liasü.

Saka pa taküm season tetenzüklen asayadag Nadal-i tarutsü atema kangabo meshisadangi liasü.

Pa temang anema ali tashi asayaner, ta taoba world number 1 yagi mapang shia jembia aru.

Saka July ita Paris Olympics nung pa den mapang talangka nungi toktepa arusang Novak Djokovic-i akokba sülen pai telemtetba ya agi.

“Iba telemtetba ya kanga tasak, aser iba telemtetba agitsü atema mapang talangka shisadangogo.

Saka iba takum nung kechiserna ajak tetenzük ka lir aser tatem ka lir.”

January ita Brisbane nung asayaba sülen Nadal ya tepi yiruba ajanga

Barcelona, Mongputeni/Oct. 10 (Agencies): Grand Slam champion 22 ben bona alisang Rafael Nadal ya tang season tembangba sülen tennis nungi anisüngzüksü.

Arishi küm 38 tain Nadal ya taruba ita Malaga nung Davis Cup Finals nung par linük Spain tenüng nung asayatsü aser pa atema aji tatem tang asütsü.

Nadal ya yiruba mechi tesüiba season ana nung kangabo masaya aser 2024 season tatem pa ‘retire’ asütsü akok ta taoba küm shia liasü.

Brehostibarnü video message ka prokshiba nung, “Ni professional tennis nungi anisüngzükler ta nenok dang ashitsü ni yangli lir,” ta Nadal-i ashi.

“Küm ishika, aser talisa tesüiba küm ana ni atema kanga mejungi aruogo. Ni

tezüokba makai asayaba ni mebileteter,” ta ashi.

Nadal ya ‘second-most successful men’s singles player of all time’ ama anisüngzükler aser pa jakdang Novak Djokovic dang lir.

‘King of Clay’ ta nungja agüja alisang Nadal-i French Open singles asayamung 14 ben koka lir aser iba Roland Garros nung asaya 116 nungi pai 112 koka lir.

Nadal ya US Open champion pezüben bona lir aser ano Australian Open aser Wimbledon asayamung anaben-ben bona lir.

Pai Olympic singles aser tarep nunga gold nguogo aser pa teyari nung Spain-i Davis Cup asayamung ponguben akok, aser tesüsa 2019 küm liasü.

Nadal-i 2023 French Open

Australian Open masayatetsüsa akum.

European clay-court season nung Nadal-i asayamung pezü nung shilem agi aser French Open mezüng round nung tamakok ajuruba ya tatem tang liasü.

Iba sülen pai Bastad nung asayamung ka aser Roland Garros nung Olympic Games nung asaya.

Davis Cup Finals asoshi pa taoba ita Spain indang squad nung inoksem, koba November 19-24 tsüngta asayatsü lir.

“Ni bilemba dang nungi kanga agi talangba aser takok tali anguba career tembangtsü mapang tetemsü ta ni bilemer,” ta Nadal-i ashi.

“Ni atema asayamung tatem tangbaji Davis Cup final ya alitsü aser kü linük tenüng nung asayatsü, aser iba atema ni pelar.”

NWA-i Asür Vechopra Puro asükhü lemsateper

Kohima, Mongputeni/Oct. 10 (TYO): Nagaland Wrestling Association (NWA) ajanga Asür Vechopra Puro asükhü lemsateper, shiba mapang talangka shiranga arur October 7, 2024 nü Nikos Hospital, Dimapur nung asü, ta sangdong ka ajanga ashi.

Nagaland Wrestling Board nungja kübok May 20, 1971 nung Kohima Local Ground nung mezüngbuba Naga Wrestling tournament alidang Chakhesang nung wrestlers 20 rongnung Asür Puro ya liasü aser parnok ya Chakhesang Wrestling Association ta ajaba Wrestling Board Phek Sub-Division tenüng nung shilem agi, ta NWA ajanga ashi.

State level Naga traditional

style nung melangtepba nung shilem agirtem rongnung Asür Puro ya mezüngbuba liasü, aser pai wrestling temaba jenjangi ajungkettsü asoshi shilem balala agiogo.

Pa ya tesayur mapa nungi anisüngzükler liasü aser yimya balala nung lanurtem nem shisatsü agüja lokti asoshi mapa tajung inyakba atema NWA aser wrestling fraternity ajungai akhum agütsür, ta ashi.

NWA ajanga mangyimer kibong den asükhü lemsateper aser asür tanüla teti tatem maka tesunep nung anisüngzükjang ta sarasademtsür.

Asür Puro asenok den meliaka pai mapa tajung inyaka yutsüba asen den teti alitsü, ta NWA sangdong ajangasa ashi.

Iba anogo kodanga marudaktsünü: Roger Federer



Paris, Mongputeni/Oct. 10 (Agencies): Switzerland nung tennis asayar tejen Roger Federer-i Brehostibarnü 22 ben Grand Slam champion bona alisang aser pa den kanga sashia toktepsang Rafael Nadal nem akhum agütsü, shiba tennis asaya anentsü sangdong.

“Koda jangratemsü, Rafa! Iba anogo kodanga marudaktsünü liasü,” ta Grand Slam takok 20 ben nguteta alisang Federer-i social media post ka nung ashi, shiba küm ana tejakdang asaya anenogo.

“Kodanga amadoktsü makokba tatalokbatem aser asenoki meimba asaya nung nai takok anguba atema kanga pelar. Ibai konang tetushi liasü.”

Rafael Nadal aser Roger Federer na toktepa ya küm 20 jungnüa tejakdang Miami nung tenzük aser nüktzü yima London nung tembang.

Iba mapang tembar tajung ana Europe, London, US aser Australia nung 40 ben asayaa liasü. Tena asayaba nung Nadal-i 24 ben aser Federer-i 16 ben koka lir.

“Roger-i asayamung

yutsüdang kü takum nung tongtipang shilema ka yutsür,” ta 2022 küm September ita Laver Cup nung arishi küm 41 tain Federer den külemi asayadag Nadal-i nüktzü yima ashi, koba Swiss nungba asoshi tatem tangba liasü.

“Pa indang career nung shilem ka ama litetba asoshi tejak tenteter saka court nung toktepakama tembar ama tembangba asoshi tali pelar,” ta Nadal-i ashi.

Nadal-i Federer den sako Grand Slam takok marok 20 ajangteta 2020 küm French Open takok marok 13 ben buba ajungketdang, ibai saisapong nung takok tulutiba lir, ta Swiss nung Federer-i shia liasü.

Nadal-i pa aleymyia asayamung tulu 22 takok marok ngutetba atema Federer-i kodanga nemjema mebilem.

“Ni Rafa den call sür ajak indang jembitet,” ta Federer-i London nung tepila sentong nung ashi.

“Küna kati ka den jangratema kazür. Küna onük million ka jembitsü lir. Ajurutep shia mekazüshi senshir.”



Revenant FC teloki 35+ Mokochung Football League season 5 koker külen champion marok agizükdang tangokba noksa nung angur. Tanabuba jenjang nung Wasang FC pur liasü. Nija senpet agizükertemji itemi liasü - Best goalkeeper: Chuba Nokdir (Wasang FC), Best defender: Sentiyanger (Revenant FC), Highest scorer: Imliyapang (Terokroker FC) aser Player of the League: Tiayang (Revenant FC). Iba den Fair play award-ji Senso SC-i agizük. Takoker aser nija senpet agizükler ajak nem sen den kulikaket senpettsü. Revenant FC-i iba league tenzükler season 5 buba atong-atonga parnoki dang champion abener. Iba league shibangba sentong nung Mokochung District Football Association, Tir, N. Akok Lkr tetushi tesemdang liasü.

BILEMDANGANG

“Nai dangar yaridang na asoshi tajangzük mebushitsüla.”